

M530: Rheinischer Merlin (Merlin und Lüthild)

0,1 inde sô wîslich was sîne tât
0,2 iz wolte berihten al den rât
0,3 ob iz wære zuo vollen tagen
0,4 iz en hôrte nieman daz gesagen
0,5 daz einige lûgene wære
0,6 iedoch pînte man es dicke sêre
0,7 daz si iz lûgene tæten sagen
0,8 hê verschiet alsô von den tagen
0,9 daz hê Merlîn en louc noch en missetete .
0,10 an engeiner hande stete
0,11 âne was hê kint hê was von listen
0,12 hê was lange unkristen
0,13 dô wolte hê gerne kristen sîn
0,14 daz tete man ime inde nante in Merlîn
0,15 dô hê quam zuo sînen tagen
0,16 bîwîlen hiez in solich sagen
0,17 waz ime solte geschien
0,18 hê en wolte es sich niet entsien
0,19 hê en sahte ie die wârheit
0,20 geschach in danne einic leit
0,21 daz en was niet sîn schult
0,22 wande – – dê wolte ez
0,23 iedoch weiz man ez ime genuoc
0,24 inde sprach ime manic ungevuoc
0,25 in guoter gedult hê ime allez nam
0,26 als iet sahte daz iz rehte quam
0,27 daz hôrten si danne vile gerne
0,28 inde hielten iz doch zuo scherne
0,29 sôwaz hê sprach daz geschach
0,30 die liute hê mâze gerne sach
0,31 der werelte hê sich ie vort entzôh
0,32 zuo lezzeste verdrôz ir inen sô
0,33 daz hê gienc in einen walt
0,34 inde leit dâ warm inde kalt
0,35 inde en az niet wan gekriute
0,36 alsus schiuwete hê die liute
0,37 doch man in bîwîlen sach
0,38 als in ieman ane sprach

0,39 den beschiet hê sînere worte
0,40 weder hê si nôte ob gerne hôrte
0,41 zuo lezzeste der küninc dit vernam
0,42 waz hê sprach daz iz volquam
0,43 dô hette hê in gerne gehât
0,44 sîne man hê dâr umbe bat
0,45 daz si in ime wolten vâhen
0,46 hê wolte in zuo sîneme râte hân
0,47 dô reit ire genuoc aldare
0,48 dâ man sîn was worden geware
0,49 als in ir einic dâ vernam
0,50 harte schiere daz hê in entquam
0,51 iedoch hê wider solichen reite
0,52 mit wârheite hê in kunt tete
0,53 daz in nieman en mohte vâhen
0,54 ein sprach “solet ir danne iemer alsus gân”
0,55 “nein ich niet” sprach Merlîn
0,56 “ich muoz gefangen sîn
0,57 von einer maget reine
0,58 die nie mannes en wart gemeine”
0,59 der truhtsæze dare quam
0,60 dâ hê Merlîne vernam
0,61 hê sprach “sage guote Merlîn
0,62 wie solich sal mîn ende sîn
0,63 sage mir ouch dû sâs in allen”
0,64 Merlîn sprach “ir sulet ervallen”
0,65 deme truhtsæzen leidete die zale
0,66 iz behâte ime mâze wole
0,67 iedoch hê zuo spotte sahte
0,68 noch mê hê iz versuochen dâhte
0,69 hê wolte iz mit listen ane vâhen
0,70 hê liez sînen bart stân
0,71 inde wandelte sîn oberkleit
0,72 ein ander pfert hê dare reit
0,73 hê suochte in biz hê in vant
0,74 dô vrâgete hê in zuohant
0,75 waz künne sîn tât solte sîn
0,76 dô sâte ime ein anderz Merlîn
0,77 “ir sulet – hangen
0,78 êr ich werde gefangen”
0,79 deme truhtsæzen daz behâte
0,80 daz hê ime zwêne tôde sâte
0,81 hê reit heim daz künden
0,82 vüre lügene sînen vriunden
0,83 als iz niemer en mohte geschien
0,84 hê sprach “ich sal morgene besien”
0,85 aber daz hê sich in tete
0,86 hê gienc zuo Merlîne umbe die rede

0,87 als hê in nie en hette gesien
0,88 hê sprach “waz sal mir geschien”
0,89 “ir sulet ertrinken” sprach Merlîn
0,90 hê sâte “wie mohte daz sîn
0,91 Merlîn dû spræches wâr ie
0,92 dû en geluoges noch nie
0,93 nû hâs dû mir dise dritte stunt
0,94 drîer hande tôt gekunt
0,95 dû lüges die zwêne Merlîn”
0,96 hê sprach “iz mac iuch liep sîn”
0,97 der truhtsæze was vile gemeit
0,98 hê gienc heim dâ bevore hê reit
0,99 inde sâte zuohant allez daz
0,100 deme küninge vüre ein pârât
0,101 inde deme gesinde alsamen
0,102 dô hatten si es iren gamen .
0,103 dâr nâh in kurzen zîten
0,104 solte der truhtsæze rîten
0,105 zuo walde jagen mit den hunden
0,106 dô si lûtes loufen begunden
0,107 hê îlete nâh dô sturzte sîn pfert
0,108 der hêre viel zuo tale wert
0,109 eine hôh leie viel hê nider
0,110 daz pfert quam kûme wider
0,111 eine vurke in mit den vüezen vienc
0,112 daz houbet ime in daz wazzer hienc
0,113 dô viel hê hine inde vertranc
0,114 dê tôt was drîvalt gemanc
0,115 daz deme truhtsæzen alsus komen was
0,116 der küninc getrûwete des debaz
0,117 der worte die Merlîn redete
0,118 der küninc in dô suochen tete
0,119 waz half daz man in vant
0,120 hê was in schiere entwant
0,121 ein mennische was in des küninges hove
0,122 dê dienete wole zuo lobe
0,123 den hatte man –
0,124 dê mennische hatte einen kneht
0,125 dê suohte Merlîn biz hê in vant
0,126 hê reit ûf in inde vienc in zehant
0,127 dô satzte hê Merlîn ûf ein pfert
0,128 inde vuorte in zuo hove wert
0,129 dâ begênete in ein junc man
0,130 vroelîchen hê singen began
0,131 dê truoc zwêne niuwe schuohen
0,132 die wânte hê an tuon
0,133 als die verslizzen wæren genuoc
0,134 die hê an den vüezen truoc

0,135 Merlîn des mannes lachete
0,136 sô sêre daz hê alle quachete
0,137 zuo lachene hê seltene pflac
0,138 des gevangen hê was dê sprach
0,139 “guote Merlîn waz diutet daz”
0,140 Merlîn sprach “muoz ich iet pârat
0,141 sô wole hân als dê dâ geit
0,142 inde morgene ûf der bâren steit
0,143 hê wænet slîzen die niuwe schuohen
0,144 hê en sal ir niemer an getuon”
0,145 die anderen des wunder nâmen
0,146 alsus si vûre den küninc quâmen
0,147 dô was der küninc harte vrô
0,148 daz was Merlîn worden sô
0,149 hê gruozte in inde hiez in sîn gemeit
0,150 hê sâte “ir sulet hân gereit
0,151 iuweren wille sunder bale
0,152 Merlîn durch daz gehalten wole
0,153 ir möhtet gerne mit mir sîn”
0,154 daz muoste lîden Merlîn
0,155 dô wart deme künige gesaht
0,156 wie Merlîn hette brâht
0,157 dô riefen si alle “Merlîn
0,158 dû muost nû ein lügenær sîn
0,159 dich solte eine juncvrouwe vâhen
0,160 daz hât nû dê kneht getân .
0,161 dê vore dînen ougen steit”
0,162 dê in vienc iz was ime leide
0,163 daz man der reden iet gewuoc
0,164 mit Worten hê iz ie undersluoc
0,165 deme künige hê sagen began
0,166 wie in begênete ein junc man
0,167 wie hê des lachete inde wie hê sprach
0,168 daz hê en lebete niemer den tac
0,169 dô sante der küninc boten dare
0,170 daz man des mannes næme ware
0,171 den jungen man si tât vunden
0,172 deme künige si daz kunten
0,173 nochdanne mannelîch dâ redete
0,174 hê hette gelogen in der stete
0,175 in hette gevangen ein kneht
0,176 Merlîn sprach “ich hân wâr inde ir unreht
0,177 hêrre küninc daz tuot beschouwen
0,178 sô gelîchet hê den juncvrouwen”
0,179 den mennischen man heimelîche besach
0,180 man vant iz als Merlîn sprach
0,181 an bursten liden inde an lîbe
0,182 maget . anders gelîch einen wîbe

0,183 sint mannelich sich wârs versach
0,184 an alle deme daz Merlîn sprach
0,185 der küninc in sint heimelîche
0,186 vrâgete umbe die rîche
0,187 inde umbe alle sîne genôzen
0,188 ob ir einic solte werden verstôzen
0,189 inde wie solich solte sîn ire tôt
0,190 ob ire einic solte lîden nôt
0,191 Merlîn sprach . “der trache von Engellant
0,192 dê is verre entvorht inde bekant
0,193 mit grôzer maht hê vert
0,194 nieman sich sîn erwert
0,195 nû sal in ein geschoz zemen
0,196 vore Limezheim sal iz ime nemen
0,197 sîn manhaftic leben
0,198 sint sal man kleine ûf in geben”
0,199 dâr nâh küninc Richart
0,200 vore Limezheim erschozzen wart
0,201 dô vrâgete in der küninc vort
0,202 wie der keiser solte sîn entvort
0,203 hê sprach “daz roemische rîche
0,204 gewinnet einen den vuhse gelîche
0,205 dê sal des mit êren walten
0,206 hê sal iz als ein lewe halten
0,207 daz sal weren eine kurze stunt
0,208 dê sal ertrinken als ein hunt”
0,209 als Merlîn hier vore sprach
0,210 deme keiser Heinrich alsô geschach
0,211 alsus wurden wâr vunden
0,212 Merlîns wort zuo allen stunten
0,213 âne lûgene alte hê den lîp
0,214 die voregenanden beslozzene wîp
0,215 ersturben in kurzen tagen gare
0,216 sint quâmen ander liute dare
0,217 inde besâzen die gereitschaf
0,218 ich wæne – Merlîne gap
0,219 die genâde inde in hette erkoren
0,220 âne sache en wart hê niet geboren
0,221 daz nie mennische en vernam
0,222 wie sîn vater zuo sînere muoter quam
0,223 noch nieman en weiz wê hê wære
0,224 sunder – – unse hêrre
0,225 dê noch geschepfet wunder
0,226 an iegelichen mennischen sunder
0,227 sîne getæne inte sîne siten
0,228 noch en is sîn wunder niet geliten
0,229 alle tage noch man sîn wunder sît
0,230 des is eine kurze zît

0,231 daz Merlîn des lîbes ende
0,232 sunder einige missewende
0,233 man mac vile von – sagen
0,234 hê hât getân in kurzen tagen
0,235 einere juncvrouwen genâde
0,236 want si vruo inde spâte
0,237 ire sinne an – kêrte
0,238 inde von kinde gerne êrte
0,239 daz is von Berge sente Liuthilt
0,240 ir was vater inde muoter holt
0,241 daz was reht want sî es verschulte
0,242 mit wîsheite inde gedulte
0,243 ire muoter von den tagen quam
0,244 ire vater ein ander wîp nam
0,245 die juncvrouwe tete als si pflac
0,246 daz was der vrouwen ungemach
0,247 als si iet durch got gap
0,248 zehant was dâ zorn ab
0,249 inde ein vile grôz vrâgen
0,250 sente Liuthilt wolte ie wâgen
0,251 daz si tete – wille
0,252 beide offenbâr inde stille
0,253 die stiefmuoter iz ie entsuop
0,254 zuo lezzeste daz si daz geschuof
0,255 daz diz der hêrre warten wolte
0,256 die guote Liuthilt die solte
0,257 in ireme kleide tragen brôt
0,258 armen den es dâ was nôt
0,259 ire vater volgete ir nâh
0,260 hê sprach “tohter waz trât ir dâ”
0,261 “vater steine .” “lâ danne schouwen”
0,262 hê entlôch den schôz der juncvrouwen
0,263 dô wart daz brôt zuohant
0,264 zuo steinen . dô hê die dâr vant
0,265 dô wart ime sîn gemoede heiz
0,266 der vrouwen hê iz zuohant verweiz
0,267 dô iz die guote den armen bôt
0,268 dô wurden dise steine aber brôt
0,269 sente Liuthilt lobete sêre
0,270 – – unsen hêrre
0,271 want hê ir an der stunde
0,272 der grôzer genâden gunde
0,273 sente Liuthilde des vile geschach
0,274 zuo einen zîten si sach
0,275 ûf ires vateres lande gân
0,276 wilde gense die wolte si vâhen
0,277 si gienc zuo den gensen dare
0,278 den gebôt si allen gare

0,279 von ires schepfærs gewalt
0,280 daz si giengen in ire behalt
0,281 der gense was mê danne tûsent dâ
0,282 der giengen iemer zwâ inde zwâ
0,283 vore ire dar si sie gân hiez
0,284 in ires vateres schiure si sie liez
0,285 si liez die schiure offen stân
0,286 si verbôt in vliegen inde gân
0,287 dô bat die juncvrouwe sêre
0,288 daz gesinde durch gotes êre
0,289 daz man der gense niet ab en tæte
0,290 si gelobeten ez inde hielten ez unstæte
0,291 die knehte ir eine stâlen
0,292 die wart geezzen in hælen
0,293 si hielt si ûf den anderen tac
0,294 biz si ire gezîte gesprach
0,295 dô gienc si zuo der schiuren
0,296 inde gruohte ire tiuren
0,297 dô gebôt si in – namen
0,298 inde allen wilden gensen samen
0,299 daz si iemer miten daz lant
0,300 dô gap si in urloup zuohant
0,301 daz si vuoren ire verte
0,302 ire engeine dannen en gerte
0,303 dô daz sente Liuthilt gesach
0,304 zuo den knehten si sprach
0,305 si hetten der gense abe getân
0,306 si muoste si wider hân
0,307 dâ wart lougenen inde sweren
0,308 daz muoste eine wîle weren
0,309 zuo lezzeste die wârheit wart gesaht
0,310 dô wurden ire die bein brâht
0,311 – – si dô des bat
0,312 daz die gans wart ûf der stat
0,313 von den beinen lebente wider
0,314 dô vuoren si enwec niemer mê sider
0,315 en quam wilde gans ûf daz plein
0,316 die genâde wolte ire – gên
0,317 noch tete – mê durch si
0,318 ein rîche man wonete dâ bî
0,319 dê was ires vateres vurhgenôz
0,320 des gireheit was sô grôz
0,321 daz hê ime sîn lant ab ier
0,322 inde en wolte es ime niet lâzen wier
0,323 zuo lezzeste quam daz in klage
0,324 dô solten si komen zuo tage